



পরিশিষ্ট-ক

ঢাকা বিশ্ববিদ্যালয়
সিনেটের বার্ষিক অধিবেশন-২০২০
সিডিকেট কর্তৃক প্রস্তাবিত আঠারতম সংবিধি সংযোজন

“বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি”

যেহেতু জাতির পিতা বঙ্গবন্ধুর শততম জন্মবার্ষিকীকে স্মরণকালের অর্জন হিসেবে তাঁর জীবন, আদর্শ, দর্শন, রাজনীতি, সমাজনীতি এবং বাঙালি জাতির পরাশক্তির হাত হইতে মুক্তি লাভ ও স্বাধীন সার্বভৌম বাংলাদেশ প্রতিষ্ঠায় তাঁর স্মরণকালের অবদান চর্চায়, প্রচারনায় এবং দেশ গঠনের রাষ্ট্র-দর্শন, রাষ্ট্র পরিচালনার প্রত্যেক স্তরে বাস্তবায়নের দিক নির্দেশনার লক্ষ্যে ঢাকা বিশ্ববিদ্যালয়ে বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি প্রতিষ্ঠা করা সমীচীন ও প্রয়োজনীয়; এবং

যেহেতু ঢাকা বিশ্ববিদ্যালয়ের সিনেটে ২৬ জুন, ২০১৯ তারিখের প্রস্তাব ও ডিনস্ কমিটির ২৬ সেপ্টেম্বর, ২০১৯ তারিখের সুপারিশ অনুযায়ী ঢাকা বিশ্ববিদ্যালয়ের সিডিকেটে ২৯ সেপ্টেম্বর, ২০১৯ তারিখে “বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি” নামে একটি গবেষণা ইনস্টিটিউট প্রতিষ্ঠার অনুমোদন দেয়া হয় এবং পরবর্তীতে ২৮ অক্টোবর, ২০১৯ তারিখে একাডেমিক পরিষদের সভায় উক্ত গবেষণা ইনস্টিটিউট অনুসমর্থিত হয়;

যেহেতু “বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি” প্রতিষ্ঠা করার জন্য উহার সংবিধি প্রণয়ন সমীচীন ও প্রয়োজনীয়;

সেহেতু Dhaka University Order, 1973 (President's Order No. 11 of 1973) এর Article 4 এর clause (j) , Article 38 এর clause (e) এর সহিত পঠিতব্য, এ ক্ষমতাবলে ঢাকা বিশ্ববিদ্যালয় এতদ্বারা নিম্নরূপ সংবিধি প্রণয়ন করিল:

১। সংবিধির নাম ও প্রবর্তন :

- (১) এই সংবিধি বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি সংবিধি (The Statutes of Bangabandhu Sheikh Mujib Research Institute for Peace and Liberty) নামে অভিহিত হইবে।
- (২) ইহা সিডিকেট কর্তৃক অনুমোদনের দিন হইতে কার্যকর হইবে।

২। সংজ্ঞা :

[১] বিষয় বা প্রসঙ্গের পরিপন্থি কোনো কিছু না থাকিলে, এই সংবিধিতে :

- (১) “কর্তৃপক্ষ” অর্থ বিশ্ববিদ্যালয়ের কোন কর্তৃপক্ষ;
- (২) “চ্যাসেলর” অর্থ বিশ্ববিদ্যালয়ের চ্যাসেলর;
- (৩) “ভাইস-চ্যাসেলর” অর্থ বিশ্ববিদ্যালয়ের ভাইস-চ্যাসেলর;
- (৪) “প্রো-ভাইস চ্যাসেলর” অর্থ বিশ্ববিদ্যালয়ের প্রো-ভাইস চ্যাসেলর (শিক্ষা);
- (৫) “কোষাধ্যক্ষ” অর্থ বিশ্ববিদ্যালয়ের কোষাধ্যক্ষ;
- (৬) “ডিন” অর্থ বিশ্ববিদ্যালয়ের কোন অনুষদের ডিন;

- (৭) “পরিচালক” অর্থ এই সংবিধির অধীন নিয়োগকৃত পরিচালক;
- (৮) “একাডেমিক কাউন্সিল” অর্থ বিশ্ববিদ্যালয়ের একাডেমিক কাউন্সিল;
- (৯) “সিডিকেট” অর্থ বিশ্ববিদ্যালয়ের সিডিকেট;
- (১০) “অনুষদ” অর্থ বিশ্ববিদ্যালয়ের কোন অনুষদ;
- (১১) “বিভাগ” অর্থ বিশ্ববিদ্যালয়ের কোন বিভাগ;
- (১২) “বিশ্ববিদ্যালয়” অর্থ [Dhaka University Order, 1973 \(President's Order No. 11 of 1973\)](#) এর অধীন স্থাপিত ঢাকা বিশ্ববিদ্যালয়;
- (১৩) “বিশ্ববিদ্যালয় আইন” বা “আইন” অর্থ Dhaka University Order, 1973 (President's Order No. 11 of 1973);
- (১৪) “সংবিধি” অর্থ, ক্ষেত্রমত, বিশ্ববিদ্যালয় আইনের অধীন প্রণীত সংবিধি বা এই সংবিধি;
- (১৫) “প্রবিধান” অর্থ, ক্ষেত্রমত, বিশ্ববিদ্যালয় আইন বা এই সংবিধির অধীন প্রণীত প্রবিধান;
- (১৬) “বিধি” অর্থ, ক্ষেত্রমত, বিশ্ববিদ্যালয় আইন বা এই সংবিধির অধীন প্রণীত বিধি;
- (১৭) “ইনস্টিটিউট” অর্থ বিধি ৩ এর অধীন প্রতিষ্ঠিত বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি (Bangabandhu Sheikh Mujib Research Institute for Peace and Liberty);
- (১৮) “ইনস্টিটিউট কমিটি” অর্থ এই সংবিধির অধীন গঠিত ইনস্টিটিউট কমিটি;
- (১৯) “বোর্ড অব গভর্নস” এই সংবিধির অধীন গঠিত বোর্ড অব গভর্নস;
- (২০) “বাছাই কমিটি” এই সংবিধির অধীন গঠিত বাছাই কমিটি;
- (২১) “বিশেষজ্ঞ প্যানেল” এই সংবিধির অধীন গঠিত বিশেষজ্ঞ প্যানেল;
- (২২) “মঞ্জুরী কমিশন আদেশ” অর্থ University Grants Commission of Bangladesh Order, 1973 (President's Order No. 10 of 1973);
- (২৩) “রেজিস্ট্রার” অর্থ বিশ্ববিদ্যালয়ের রেজিস্ট্রার;
- (২৪) “শিক্ষক” অর্থ বিশ্ববিদ্যালয়ের অধ্যাপক, সহযোগী অধ্যাপক, সহকারী অধ্যাপক, প্রভাষক এবং বিশ্ববিদ্যালয় কর্তৃক শিক্ষক হিসেবে স্বীকৃত কোন ব্যক্তিও ইহার অন্তর্ভুক্ত হইবেন;
- (২৫) “কর্মকর্তা” অর্থ বিশ্ববিদ্যালয়ের কোন কর্মকর্তা;
- (২৬) “কর্মচারী” অর্থ বিশ্ববিদ্যালয়ের কোন কর্মচারী;
- (২৭) অঙ্গীভূত প্রতিষ্ঠান- ঢাকা বিশ্ববিদ্যালয় আদেশ, ১৯৭৩ এর সংজ্ঞায় অঙ্গীভূত প্রতিষ্ঠান হিসেবে বিবেচিত হইবে;
- (২৮) “সংস্থা” অর্থ বিশ্ববিদ্যালয়ের কোন সংস্থা।

[২] এই সংবিধিতে যে সকল শব্দ বা অভিব্যক্তির সংজ্ঞা প্রদান করা হয় নাই, সেই সকল শব্দ বা অভিব্যক্তি Dhaka [University Order, 1973](#) এ যে অর্থে ব্যবহৃত হইয়াছে সেই অর্থে ব্যবহৃত হইবে।

৩। এখতিয়ার :

ইনস্টিটিউট এই সংবিধির বিধান অনুযায়ী বা ইহার অধীনে প্রণীত বিধি ও প্রবিধান দ্বারা অর্পিত সমুদয় ক্ষমতা প্রয়োগ করিবে।

৪। ইনস্টিটিউট স্থাপন :

- (১) এই সংবিধির বিধান অনুযায়ী বঙ্গবন্ধু শেখ মুজিব রিসার্চ ইনস্টিটিউট ফর পিস এন্ড লিবার্টি (Bangabandhu Sheikh Mujib Research Institute for Peace and Liberty) নামে একটি ইনস্টিটিউট স্থাপিত হইবে।
- (২) এই ইনস্টিটিউট ঢাকা বিশ্ববিদ্যালয়ের একটি বিধিবদ্ধ সংস্থা যাহা ঢাকা বিশ্ববিদ্যালয় আদেশ, ১৯৭৩ এর অধীনে এবং স্বীয় সংবিধি দ্বারা পরিচালিত হইবে।

৫। ইনস্টিটিউটের উদ্দেশ্য ও কার্যাবলি :

ইনস্টিটিউটের উদ্দেশ্য ও কার্যাবলি হইবে নিম্নরূপ :

- (১) মানবাধিকারের স্বীকৃতি ও বাঙালি জাতির মুক্তি ও স্বাধীন সার্বভৌম বাংলাদেশ সৃষ্টিতে মহান মুক্তিযুদ্ধে নেতৃত্বদানকারী সর্বকালের সর্বশ্রেষ্ঠ বাঙালি জাতির পিতা বঙ্গবন্ধু শেখ মুজিবুর রহমানের জীবন ও দর্শন ও তাঁর অনন্য অবদান এবং নেতৃত্বের ওপর উচ্চতর গবেষণা ও চর্চা, বাঙালি জাতির সার্বিক মুক্তির সাথে নিবিড়ভাবে সম্পর্কিত বাংলাদেশের মহান মুক্তিযুদ্ধ, গণতন্ত্র, গণতান্ত্রিক আন্দোলন ও সংগ্রাম এবং বাংলাদেশের ইতিহাস, সংস্কৃতি, ভাষা, সাহিত্য, দর্শন, প্রত্নতত্ত্ব, অর্থনীতি, রাজনীতি, সমাজবিজ্ঞান, ভূগোল, সঙ্গীত, শিল্পকলা, আইন ও অন্যান্য প্রাসঙ্গিক বিষয়ে উচ্চতর গবেষণা ও চর্চা এবং উক্তরূপ গবেষণা ও চর্চার জন্য সনদ ও স্বীকৃতি প্রদান;
- (২) দেশ পরিচালনায় ও দেশের রাজনৈতিক সংস্কৃতিতে জাতির পিতা বঙ্গবন্ধু শেখ মুজিবুর রহমানের আদর্শ অনুসরণ করিতে আগামী প্রজন্মকে অনুপ্রাণিত করা;
- (৩) স্বাধীনতা সংগ্রাম ও মুক্তিযুদ্ধের প্রকৃত ও সঠিক ইতিহাস চর্চা ও দেশ-বিদেশে উহা প্রকাশ করা;
- (৪) দেশী ও বিদেশী সরকারি ও বেসরকারি বিশ্ববিদ্যালয় ও সংশ্লিষ্ট প্রতিষ্ঠানের সাথে পারস্পরিক চুক্তি ও সমঝোতা সাপেক্ষে গবেষণা পরিচালনা করা;
- (৫) স্বাধীনতা সংগ্রাম ও মুক্তিযুদ্ধের অবিনাশী চেতনার নিরবিচ্ছিন্ন চর্চা ও গবেষণা করা;
- (৬) ইনস্টিটিউটের শিক্ষা ও গবেষণার সম্প্রসারণ ও উন্নয়নের জন্য বিশ্ববিদ্যালয়ের অনুমতিক্রমে দেশী ও বিদেশী ব্যক্তি বা প্রতিষ্ঠানের নিকট হইতে অনুদান, চাঁদা ও বৃত্তি গ্রহণ করা এবং ট্রাস্ট গঠন করা;
- (৭) গবেষণার জন্য যাঁহারা এই ইনস্টিটিউটে নিবন্ধিত হইবেন, তাঁহারা অনূন্য দশ বৎসর পর্যন্ত দেশের অন্যান্য বিশ্ববিদ্যালয় ও প্রাসঙ্গিক গবেষণা প্রতিষ্ঠানের সাথে পারস্পরিক চুক্তির ভিত্তিতে প্রধান/সহযোগী তত্ত্বাবধায়কের অধীনে গবেষণা কাজ

পরিচালনার সুযোগ পাইবেন;

- (৮) গবেষণার ফলাফল দেশ ও বিদেশে প্রচারের মাধ্যমে ইনস্টিটিউটকে পরিচিত করিয়া তোলা এবং সেই সকল গবেষণালব্ধ ফলাফল দেশ ও সমাজের প্রাসঙ্গিক উন্নয়ন ও পরিকল্পনায় প্রয়োগ করা;
- (৯) শিক্ষা ও গবেষণার উন্নয়নের জন্য একাডেমিক মিউজিয়াম, সংগ্রহশালা, পরীক্ষাগার, কর্মশিবির স্থাপন ও রক্ষণাবেক্ষণ করা;
- (১০) শিক্ষা ও গবেষণার উন্নতি ও অগ্রগতির জন্য পুস্তক ও জার্নাল প্রকাশ করা এবং তথ্য ও প্রযুক্তি ব্যবহারের সুযোগ সৃষ্টি করা;
- (১১) সেমিনার, সিম্পোজিয়াম, সম্মেলন, প্রকাশনা ও প্রশিক্ষণের মাধ্যমে ইনস্টিটিউটকে দেশ ও বিদেশের বিভিন্ন বিশ্ববিদ্যালয় ও পণ্ডিত ব্যক্তিদের সহিত পরিচিত করা;
- (১২) ইনস্টিটিউটের লক্ষ্য অর্জনের জন্য কোন চুক্তিতে আবদ্ধ হওয়া, চুক্তি বাস্তবায়ন করা এবং প্রয়োজনে চুক্তির শর্ত পরিবর্তন করা অথবা চুক্তি বাতিলের প্রস্তাব সুপারিশ;
- (১৩) মেধার স্বীকৃতি প্রদানের উদ্দেশ্যে ইনস্টিটিউট যেইরূপ উপযুক্ত বিবেচনা করিবে সেইরূপ ফেলোশীপ, স্কলারশীপ, পদক ও অন্যান্য পুরস্কার প্রবর্তন করা;
- (১৪) এই সংবিধির অধীষ্ট লক্ষ্য অর্জন ও বাস্তবায়নকল্পে প্রয়োজনীয় অন্যান্য যে কোন কার্য সম্পাদন করা।
- (১৫) বিশ্ববিদ্যালয় কর্তৃক সময় সময় প্রদত্ত নির্দেশনা সাপেক্ষে, উহার উপর অর্পিত অন্যান্য দায়িত্ব পালন করা; এবং

৬। বোর্ড অব গভর্নসের গঠন :

(১) নিম্নবর্ণিত সদস্য সমন্বয়ে ইনস্টিটিউটের বোর্ড অব গভর্নস গঠিত হইবে-

কার্যকাল
২ বৎসর

- (ক) ভাইস-চ্যান্সেলর, যিনি উহার সভাপতিও হইবেন;
- (খ) প্রো-ভাইস-চ্যান্সেলর(শিক্ষা);
- (গ) কোষাধ্যক্ষ;
- (ঘ) সিডিকেট কর্তৃক মনোনীত একজন শিক্ষক সিডিকেট সদস্য;
- (ঙ) সিনেট কর্তৃক মনোনীত একজন গবেষক সিনেট সদস্য;
- (চ) একাডেমিক কাউন্সিল কর্তৃক মনোনীত একজন একাডেমিক কাউন্সিলের সদস্য;
- (ছ) ইতিহাস, অর্থনীতি, আইন, রাষ্ট্রবিজ্ঞান, দর্শন ও সমাজবিজ্ঞান বিভাগের শিক্ষকগণের মধ্য হইতে তিনজন শিক্ষক (তন্মধ্যে একজন অধ্যাপক, একজন সহযোগী অধ্যাপক ও একজন সহকারী অধ্যাপক), যাহারা সংশ্লিষ্ট ডিন কর্তৃক জ্যেষ্ঠতা অনুযায়ী সুপারিশের ভিত্তিতে, ভাইস-চ্যান্সেলর কর্তৃক দুই বৎসরের জন্য আবর্তনের ভিত্তিতে মনোনীত হইবেন;

তবে শর্ত থাকে যে, একাধিক বিভাগে সমজ্যেষ্ঠ শিক্ষক থাকিলে, সেইক্ষেত্রে তাহাদের মধ্যে মনোনয়ন ভাইস-চ্যান্সেলর কর্তৃক নির্দিষ্ট হইবে;

(জ) ইনস্টিটিউটের পরিচালক, যিনি ইহার বোর্ড অব গভর্নসের সদস্য-সচিবও হইবেন।

(২) উপ-সংবিধি (১)(ছ) এর অধীন মনোনীত সদস্যগণের সদস্য পদের মেয়াদ হইবে তাহাদের মনোনয়নের উল্লিখিত সময়কাল :

তবে শর্ত থাকে যে, মনোনয়ন প্রদানকারী, উক্ত সদস্যের মেয়াদ শেষ হইবার পূর্বে, যে কোন সময় কারণ দর্শানো সাপেক্ষে তাহার সদস্যপদ হইতে অব্যাহতি প্রদান করিতে পারিবে এবং কোন মনোনীত সদস্য মনোনয়ন প্রদানকারীর উদ্দেশ্যে স্বাক্ষরযুক্ত পত্রযোগে যে কোন সময়ে পদত্যাগ করিতে পারিবেন। পদশূন্য হইলে উপাচার্য উক্ত পদ নির্দিষ্ট ক্যাটাগরির সদস্য দ্বারা মনোনয়নপূর্বক নিয়োগ দিবেন।

(৩) বোর্ড অব গভর্নসের মেয়াদকাল হইবে ২ বৎসর।

৭। বোর্ড অব গভর্নসের ক্ষমতা ও কার্যাবলি :

- (১) ইনস্টিটিউটের পরিচালক কর্তৃক প্রস্তুতকৃত বাৎসরিক একাডেমিক কোর্স, গবেষণা প্রোগ্রাম ও বাজেট প্রাক্কলন পরীক্ষা-নিরীক্ষাপূর্বক অনুমোদন;
- (২) ইনস্টিটিউটের শিক্ষক, কর্মকর্তা ও কর্মচারীদের চাকরির শর্তাবলি নির্ধারণ;
- (৩) নিয়োগ কমিটির গঠন এবং সুপারিশের ভিত্তিতে ইনস্টিটিউটের শিক্ষক, কর্মকর্তা ও কর্মচারীদের নিয়োগ প্রদান;
- (৪) দেশ ও বিদেশের প্রখ্যাত পণ্ডিতদের ইনস্টিটিউটে গবেষণা বা প্রশিক্ষণ অথবা উভয় কাজে কোন প্রতিষ্ঠানের সাথে যুক্ত এমন ব্যক্তিদের ভিজিটিং অধ্যাপক বা ফেলো হিসেবে আমন্ত্রণ;
- (৫) সিভিলিটিউটের অনুমোদনের জন্য ইনস্টিটিউটের উপযুক্ত ব্যবস্থাপনা, প্রশাসন ও পরীক্ষাসমূহ পরিচালনার জন্য প্রয়োজনীয় বিধিবিধান প্রণয়ন;
- (৬) সিভিলিটিউটের অনুমোদন অনুসারে স্থায়ী ভিত্তিতে প্রশাসনিক, একাডেমিক, টেকনিক্যাল, সেক্রেটারিয়াল বা অন্যান্য পদ সৃষ্টি বা বিলুপ্ত বা স্থগিত করা;
- (৭) এই সংবিধির অধীষ্ট লক্ষ্য অর্জন ও বাস্তবায়নকল্পে প্রয়োজনীয় অন্যান্য যে কোন কার্য সম্পাদন।
- (৮) গবেষণা প্রকল্প মূল্যায়ন, প্রকল্পকার্য তত্ত্বাবধান ও প্রকল্প প্রতিবেদন মূল্যায়নের জন্য ইনস্টিটিউটের পরিচালক কর্তৃক সুপারিশকৃত প্যানেল নিরীক্ষণ ও অনুমোদন করা;
- (৯) মূল্যায়নকৃত গবেষণা প্রকল্প অনুমোদন এবং নিরীক্ষণকৃত প্রকল্প প্রতিবেদন গ্রহণ;
- (১০) গবেষণা প্রকল্প সফলভাবে সম্পাদন অস্ত্রে গবেষক ও প্রশিক্ষণকার্যে অংশগ্রহণের জন্য প্রশিক্ষণার্থীদের পরিচালক কর্তৃক সুপারিশ অনুযায়ী সনদ প্রদান করা;
- (১১) প্রকল্প কার্য পরিচালনা, প্রশিক্ষণ কার্য সম্পাদন ও সংশ্লিষ্ট অন্যান্য ব্যয়ের অনুমোদন করা;
- (১২) উপযুক্ত ক্ষেত্রে পরিচালক কর্তৃক সুপারিশ অনুযায়ী বৃত্তি অনুমোদন ও প্রদান করা;

(১৩) দেশী ও বিদেশী দান অনুদান গ্রহণ ও টাস্ট্র গঠনের অনুমোদন;

৮। বোর্ড অব গভর্নসের সভা :

- (১) বোর্ড অব গভর্নস প্রতি তিন (৩) মাসে অন্তত একবার সভায় মিলিত হইবে এবং সভার তারিখ, সময় ও স্থান সভাপতি কর্তৃক নির্ধারিত হইবে।
- (২) বোর্ড অব গভর্নসের সভা সভাপতির সম্মতিক্রমে সদস্য-সচিবের স্বাক্ষরিত লিখিত নোটিশ দ্বারা আহুত হইবে।
- (৩) সভাপতি বোর্ড অব গভর্নসের সভায় সভাপতিত্ব করিবেন।
- (৪) বোর্ড অব গভর্নসের সভার কোরামের জন্য উহার মোট সদস্য সংখ্যার অনূন্য এক-তৃতীয়াংশ সদস্যের উপস্থিতির প্রয়োজন হইবে, তবে মূলতবী সভার ক্ষেত্রে কোন কোরামের প্রয়োজন হইবে না।
- (৫) বোর্ড অব গভর্নসের সভায় উপস্থিত প্রত্যেক সদস্যের একটি করিয়া ভোট থাকিবে এবং সংখ্যা গরিষ্ঠ ভোটের ভিত্তিতে সভায় সিদ্ধান্ত গৃহীত হইবে, তবে প্রদত্ত ভোটের সমতার ক্ষেত্রে সভার সভাপতি দ্বিতীয় বা নির্ণায়ক ভোট প্রদান করিতে পারিবেন।
- (৬) শুধুমাত্র কোন সদস্য পদে শূন্যতা বা বোর্ড অব গভর্নস গঠনে ত্রুটি থাকিবার কারণে বোর্ড অব গভর্নসের কার্য বা কার্যধারা অবৈধ হইবে না এবং তদসম্পর্কে কোন প্রশ্নও উত্থাপন করা যাইবে না।

৯। বোর্ড অব স্টাডিজ গঠন :

নিম্নবর্ণিত সদস্য সমন্বয়ে ইনস্টিটিউটের বোর্ড অব স্টাডিজ গঠিত হইবে :

- (ক) ইনস্টিটিউটের পরিচালক, যিনি উহার সভাপতি হইবেন;
- (খ) বোর্ড অব গভর্নস কর্তৃক মনোনীত বিশ্ববিদ্যালয়ের দুইজন অধ্যাপক;
- (গ) বোর্ড অব গভর্নস কর্তৃক অনুমোদিত ইনস্টিটিউটের পরিচালক কর্তৃক প্রস্তাবিত বিশ্ববিদ্যালয়ের সংশ্লিষ্ট বিভাগসমূহের তিন (৩) জন স্বনামধন্য শিক্ষক।

১০। বোর্ড অব স্টাডিজের ক্ষমতা ও কার্যাবলি :

- (ক) ইনস্টিটিউটের পঠন-পাঠনের কোর্স ও সিলেবাস প্রণয়ন;
- (খ) ইনস্টিটিউটে গবেষকদের নিবন্ধন ও গবেষণা সংশ্লিষ্ট বিধিবিধান প্রণয়ন;
- (গ) ইনস্টিটিউটের সনদের জন্য প্রয়োজনীয় পূরণীয় শর্ত নির্ধারণ;
- (ঘ) দফা (ক) হইতে (ঘ) -তে প্রণীত বিষয়াদি সম্পর্কে বোর্ড অব গভর্নসের অনুমোদন গ্রহণ;
- (ঙ) প্রয়োজনে বিশেষ প্যানেল গঠনের সুপারিশ;

১১। বোর্ড অব স্টাডিজের সভা :

- (১) বোর্ড অব স্টাডিজ প্রতি তিন মাস অন্তর একবার সভায় মিলিত হইবে এবং সভার তারিখ, সময় ও স্থান সভাপতি কর্তৃক নির্ধারিত হইবে।
- (২) বোর্ড অব স্টাডিজের সভা, সভাপতির সম্মতিক্রমে সদস্য-সচিবের স্বাক্ষরিত লিখিত নোটিশ দ্বারা আহুত হইবে।

- (৩) চেয়ারম্যান বোর্ড অব স্টাডিজের সভায় সভাপতিত্ব করিবেন।
- (৪) বোর্ড অব স্টাডিজের সভার কোরামের জন্য উহার মোট সদস্য সংখ্যার অনূন্য এক-তৃতীয়াংশ সদস্যের উপস্থিতির প্রয়োজন হইবে, তবে মূলতবী সভার ক্ষেত্রে কোন কোরামের প্রয়োজন হইবে না।
- (৫) বোর্ড অব স্টাডিজের সভায় উপস্থিত প্রত্যেক সদস্যের একটি করিয়া ভোট থাকিবে এবং সংখ্যাগরিষ্ঠ ভোটের ভিত্তিতে সভায় সিদ্ধান্ত গৃহীত হইবে, তবে প্রদত্ত ভোটের সমতার ক্ষেত্রে সভার সভাপতি দ্বিতীয় বা নির্ণায়ক ভোট প্রদান করিতে পারিবেন।
- (৬) শুধুমাত্র কোন সদস্য পদে শূন্যতা বা বোর্ড অব স্টাডিজ গঠনে ত্রুটি থাকিবার কারণে বোর্ড অব স্টাডিজের কার্য বা কার্যধারা অবৈধ হইবে না এবং তদসম্পর্কে কোন প্রশ্নও উত্থাপন করা যাইবে না।

১২। পরিচালক :

- (১) ইনস্টিটিউটের একজন পরিচালক থাকিবেন।
- (২) ভাইস-চ্যান্সেলরের সুপারিশের ভিত্তিতে সিন্ডিকেট কর্তৃক বিশ্ববিদ্যালয়ের একজন সিনিয়র অধ্যাপককে পরিচালক হিসেবে ৩ (তিন) বৎসরের জন্য সিন্ডিকেট কর্তৃক নির্ধারিত শর্তে নিযুক্ত করা হইবে।
- (৩) পরিচালক ইনস্টিটিউটের প্রাত্যহিক কার্যাবলী সম্পাদনসহ ইহার লক্ষ্য ও উদ্দেশ্য বাস্তবায়নের লক্ষে বোর্ড অব গভর্নর্স, বোর্ড অব স্টাডিজ-এ গৃহীত সিদ্ধান্তসমূহ বাস্তবায়ন এবং প্রতিবেদন প্রণয়ন করিবেন;
- (৪) বিশ্ববিদ্যালয় প্রশাসনের সঙ্গে প্রয়োজনীয় ক্ষেত্রে সকল সহযোগীতা ও কার্য সমন্বয় করিবেন;

১৩। বিশ্ববিদ্যালয়ের শিক্ষকদের ইনস্টিটিউটে সাময়িক প্রেষণে নিয়োগ :

উপাচার্য বোর্ড অব গভর্নর্সের সুপারিশের ভিত্তিতে বিশ্ববিদ্যালয়ের পিএইচডি ডিগ্রীধারী সহযোগী অধ্যাপক পদের নিম্নে নয় এমন শিক্ষকগণ ইনস্টিটিউটে গবেষণা সুপারভাইজ বা প্রশিক্ষণে বা উভয় কাজ করার জন্য নির্দিষ্ট মেয়াদে ইনস্টিটিউটে প্রেষণে নিয়োগ দিতে পারিবেন। এ নিয়োগের মেয়াদ হইবে দুই (২) বৎসর। তিনি পরবর্তী দুই (২) বৎসরের জন্য আরও একবার নিয়োগ পাইতে পারেন।

১৪। ইনস্টিটিউটের প্রশাসনিক কর্মকর্তা ও কর্মচারি :

ইনস্টিটিউটে একজন ডেপুটি রেজিস্ট্রার (সমমানের কর্মকর্তা) নিযুক্ত থাকিবেন, যিনি পরিচালকের অধিনস্থ থাকিবেন এবং ইনস্টিটিউটের অফিস পরিচালনা করিবেন। এছাড়া তিনি বোর্ড অব স্টাডিজ-এর সদস্য-সচিবও হবেন। উক্ত অফিসের কাজে সহায়তার জন্য ১জন সেকশন অফিসার ও ১জন একাউন্টস অফিসার এবং প্রয়োজনীয় সংখ্যক অফিস সহায়ক থাকবে।

১৫। ইনস্টিটিউটের তহবিল :

- (১) এ প্রতিষ্ঠানের আর্থিক বরাদ্দ ঢাকা বিশ্ববিদ্যালয়ের বাজেট হইতে হইবে;
- (২) প্রতি অর্থবছর এপ্রিল মাসের মধ্যে পরিচালক ইনস্টিটিউটের বাজেট প্রাক্কলন বোর্ড অব গভর্নর্সের অনুমোদনের জন্য পেশ করিবেন;
- (৩) বাজেট ব্যয়ের সমন্বয় সাধন করিবেন;
- (৪) সরকার, দেশী বিদেশী প্রতিষ্ঠান এবং ব্যক্তি হইতে প্রাপ্ত দান-অনুদান, উপহার ইত্যাদি দ্বারা তহবিল সমৃদ্ধ করিতে পারিবে।

১৬। সংবিধির সংশোধন :

বোর্ড অব গভর্নসের প্রস্তাবে এবং সিন্ডিকেটের অনুমোদনক্রমে এই সংবিধির সংশোধন, পরিবর্তন, পরিবর্ধন ও পুনঃনিরীক্ষা করা যাইবে।

(সিন্ডিকেট ১০.০৬.২০২০)